


Los ntawm Thawj Tswj
Hwm Henry B. Eyring

Tus Pab Cuam thib Ib hauv
Thawj Pawg Thawj Tswj Hwm



Kev Pab Lwm Tus thiab Txoj Sia Nyob Mus Ib Txhis

Tus Cawm Seej yog peb tus yam ntxwv txog kev ua siab dawb pab lwm tus. Nws tau siv tag nrho Nws lub neej pab Leej Txiv Saum Ntuj Ceeb Tsheej thiab Nws Leej Txiv cov me nyuam txhua tus. Leej Txiv thiab Leej Tub koom siab ua hauj lwm kom peb thiaj muaj lub txiaj ntsim ntawm kev tsis txawj tuag thiab txoj koob hmoov uas yog txoj sia nyob mus ib txhis (saib Mauxes 1:39).

Yog peb yuav tsum nyog txais txoj sia nyob mus ib txhis, peb yuav tsum cia Yexus Khetos txoj Kev Theej Txhoj hloov peb lub siab—peb yuav tsum yug los dua tshiab thiab cia Nws ntxuav peb tej kev txhaum mus. Tiam sis, cov me nyuam uas tsis tau muaj yim xyoo tsis muaj kev txhaum thiab txais kev txhiv dim los ntawm txoj Kev Theej Txhoj (saib Mauxiyas 3:16, 21; Maulaunais 8:10–12).

Rau peb txhua tus uas muaj hnuv nyoog lav ris, muaj ib txoj hau kev uas cia peb tshem peb tej kev txhaum mus thiab npaj peb los txais yuav txoj sia nyob mus ib txhis. Qhov kev npaj ntawd pib thaum peb ua kev cai raus dej los ntawm ib tug uas muaj txoj cai pov thawj hwj thiab thaum peb txais tus Vaj Ntsuj Plig Dawb Huv. Ces peb yuav tsum nco ntsoov tus Cawm Seej thiab ua raws li cov lus txib uas Nws tau qhia rau peb.

Tus Vaj Ntxwv Npeyamias qhia nws cov neeg nyob hauv Phau Ntawv Maumoos txog kev xyiv fab uas muaj

thaum yus txais kev zam txim rau yus tej kev txhaum los ntawm Yexus Khetos txoj Kev Theej Txhoj. Ces nws qhia lawv hais tias yog lawv xav txais kev zam txim, lawv yuav tsum qhia kom lawv cov me nyuam ib leeg pab ib leeg thiab lawv yuav tsum ua siab dawb siab zoo kom pab cov uas nyob ib puag ncig lawv ntawm sab cev nqaij daim tawv thiab sab ntsuj plig. (Saib Mauxiyas 4:11–16).

Nws kuj qhia hais tias, “Thiab saib seb, kuv qhia nej tej yam no xwv kom nej yuav kawm tau kev txawj ntse; xwv kom nej yuav kawm tau tias thaum nej ua hauj lwm rau nej tej neeg nruab ze ces nej tsuas ua hauj lwm rau nej tus Vajtswv xwb” (Mauxiyas 2:17).

Yexus tau mus qhia Nws txoj moo zoo thiab ua tej yam zoo (saib Tes Hauj Lwm 10:38). Nws kho neeg mob. Nws tsa cov neeg sawv hauv qhov tuag rov qab los. Nrog Nws lub hwj chim Nws pub mov rau ntau txhiab neeg noj thaum lawv tshaib plab thiab tsis muaj mov noj (saib Mathais 14:14–21; Yauhas 6:2–13). Tom qab Nws sawv rov los Nws tau pub mov rau ob peb tug ntawm Nws cov Thwj Tim tom qab lawv tuaj txog ntug Dej Hiav Txwv Kalilais (saib Yauhas 21:12–13). Nyob hauv teb chaws Amelikas, Nws tau kho neeg mob thiab foom koob hmoov rau cov me nyuam ib tug dhau ib tug (saib 3 Nifais 17:7–9, 21).

Tus Thwj Tim Yakaunpaus tau qhia peb hais tias

qhov uas peb xav pab lwm tus twb los ntawm qhov uas peb ris tus Tswv txiaj rau tej yam uas Nws tau ua rau peb.

“Tiam sis tus uas ua tib zoo saib tseeb tseeb txoj kev cai uas zoo kawg nkaus uas pab tau neeg dim los nyob ywj pheej. Tus uas khaws tej lus ntawd cia rau hauv nruab siab thiab xyaum ua raws li tej lus ntawd, thiab tsis yog mloog tas xwb tsis nco qab lawm, Vajtswv yuav foom koob hmoov rau nws. . . .

“Txoj kev cai uas Vajtswv tus uas yog peb Leej Txiv suav hais tias yog txoj uas zoo thiab tseeb, txoj ntawd yog nej yuav tsum pab cov poj ntsuam thiab cov me nyuam ntsuag uas raug kev txom nyem quaj ntsuag. Thiab nej tsis txhob mus nrog neeg ntiaj teb ua phem ua qias” (Yakaunpaus 1:25, 27).

Ib qho uas qhia hais tias tus Ntsuj Plig tab tom ua rau nej dawb huv yog qhov uas nej xav pab lwm tus rau tus Cawm Seej. Nej xav qhia tom tsev thiab mus saib xyuas tom tsev vim ua li ntawd ua rau nej zoo siab thiab tsis yog vim yog ib txoj hauj lwm xwb. Nej ua hauj lwm dawb pab lwm tus ntau ntxiv nyob hauv ib lub tsev kawm ntawv los yog pab saib xyuas cov neeg pluag nyob hauv nej zej zog. Txawm nej tsis muaj nyiaj ntau pub rau cov uas muaj tsawg dua li nej, nej xav muaj ntxiv nej thiaj pub tau ntxiv (saib Mauxiyas 4:24). Nej mob siab xav pab nej cov me nyuam thiab qhia lawv kom lawv paub pab lwm tus.

Thaum nej hloov siab tiag tiag, nej yuav haj yam xav pab lwm tus neeg tsis xav kom leej twg qhuas yus. Kuv paub tus Cawm Seej cov thwj tim ib txhia uas tau pub nyiaj ntau thiab mob siab ua hauj lwm ntau tiam sis tsis muaj leej twg tsuas yog Vajtswv thiab lawv cov me nyuam uas paub txog qhov ntawd. Vajtswv tau pom zoo rau lawv tej hauj lwm thaum nws foom koob hmoov rau lawv hauv lub neej no, thiab Nws yuav foom koob hmoov rau lawv nyob hauv lub neej tom ntej (saib Mathais 6:1–4; 3 Nifais 13:1–4).

Thaum nej tau ua raws li lo lus txib kom pab lwm tus (saib Mathais 22:39), nej tej kev muaj hlob tau hloov. Tus Cawm Seej qhia Nws cov Thwj Tim thaum lawv sib cav txog qhov uas leej twg yuav ua tus neeg loj dua ntais. Nws hais tias:

“Thiab tsis txhob cia leej twg hu nej hais tias, Tus Tswv, rau qhov nej tsuas muaj tib tug Tswv uas yog tus Khetos xwb.

“Nej cov leej twg xav ua tus hlob, tus ntawd yuav tsum ua nej sawv daws qhev” (Mathais 23:10–11).

Tus Cawm Seej qhia peb tias peb yuav ua dab tsi kom kawm tau kev pab lwm tus. Nws tau pab lwm tus zoo tag nrho, thiab peb yuav tsum kawm pab lwm tus ib yam li Nws tau kawm—ib nqe lus ntxiv rau ib nqe lus (saib Q&K 93:12–13). Los ntawm qhov uas peb pab lwm tus, peb yuav rais los ua neeg zoo li Nws. Peb yuav thov Vajtswv kawg siab kawg ntsws kom hlub peb cov yeeb ncuab ib yam li Nws hlub lawv (saib Mathais 5:43–44; Maulaunais 7:48). Ces thaum kawg peb yuav tsim nyog txais txoj sia nyob mus ib txhis nrog Nws thiab peb Leej Txiv Saum Ntuj Ceeb Tsheej.

Kuv cog lus tias peb yuav pab lwm tus zoo dua ntais thaum peb ua raws li tus Cawm Seej tej lus qhia thiab tus yam ntxwv.

QHIA LOS NTAWM TSAB XOV NO

Txwj Laug M. Russell Ballard ntawm Pawg Kaum Ob tug Thwj Tim tau yaum peb thov Vajtswv kom txais tej lub cib fim pab lwm tus: “Txhua hnub thaum sawv ntxov thaum nej thov Vajtswv, thov Leej Txiv Saum Ntuj Ceeb Tsheej coj nej kev pom cib fim pab ib tug ntawm Nws cov me nyuam uas muaj nqi. Ces cia li. . . tas ib hnub nrhiav ib tug uas nej pab tau” (“Be Anxiously Engaged,” *Ensign* los sis *Liahona*, Kaum Ib Hlis Ntuj 2012, 31). Xav seb puas tsim nyog caw cov neeg uas koj qhia cuab hom phiaj thov Vajtswv txhua hnub kom muaj cib fim pab lwm tus ces nrhiav lawv tas ib hnub.

TUB HLUAS NTXHAIS HLUAS

Kev Teb Nws tej Lus Thov

Los ntawm Siphilile Khumalo

Muaj ib hmo ib tug phooj ywg uas tsis ntseeg li peb tuaj xyuas kuv. Feem ntau kuv kawm kuv cov vaj lug kub kuv tus kheej, thiab hmo ntawd kuv twb nqa kuv cov vaj lug kub tawm kom kuv kawm tau. Kuv txais kev tshoov siab kom caw nws nrog kuv koom los kawm vaj lug kub, tiam sis kuv ntshai thiab pib kawm kuv tus kheej xwb. Kuv paub tias kuv twb muab tus Ntsuj Plig txoj kev tshoov siab tso tseg lawm. Tom qab ob peb feeb kuv nug nws hais tias, “Koj puas xav nrog kuv kawm vaj lug kub?” Kuv tus phooj ywg teb kiag hais tias, “Xav mas.”

Ces wb tau nyeem Phau Ntawv Maumoos ua ke. Nws nug kuv ob peb yam, thiab kuv paub tias tus Ntsuj Plig tau koj kuv kev thaum kuv teb nws cov lus nug. Kuv ua tim khawv txog qhov uas Phau Ntawv Maumoos muaj tseeb. Tom qab nws tau ua li no, nws qhia kuv tias, "Tas hnuv no kuv quaj quaj thiab ntshai. Kuv nyuam qhuav thov Vajtswv pab kuv thaum koj nug kuv seb puas xav nrog koj nyeem vaj lug kub. Tam sim no kuv nyob kaj siab lug lawm. Ua tsaug."

Kuv yog ib lub cuab yeej uas tus Tswv siv kom teb ib tug neeg tej lus thov thiab pab Nws ib tug me nyuam uas xav tau kev pab. Kuv paub tias kev tshoov siab yog tej lus qhia ntawm ib Leej Txiv uas muaj tswv yim thiab yeeb koob tag nrho. Thaum peb muab peb tej kev ntshai tso tseg, peb cia Nws qhia Nws lub hwj chim dhau los ntawm peb txoj kev mloog lus.

Tus sau zaj no nyob hauv Gauteng, South Africa teb.

COV ME NYUAM

Nrhiav Kev Pab Lwm Tus

Koj muaj cai xaiv ua raws li Yexus Khetos ua thiab pab lwm tus. Kos duab txog qhov uas koj pab ib tug hauv koj tsev neeg los yog ib tug phooj ywg thiab tso koj daim duab ntawm ib qho chaw uas koj pom tau kom koj nco qab tias yuav tsum ua siab zoo txhua hnuv.

© 2014 los ntawm Intellectual Reserve, Inc. Ceev txhua txoj cai. Luam tawm hauv Teb Chaws Amelikas. Pub luam tawm ua lus Akiv: 6/13. Pub txhais ua lus Hmoob: 6/13. Kev txhais lus *First Presidency Message, March 2014*. Hmong. 10863 295



Yexus Khetos lub Luag Hauj Lwm Los Saum Ntuj Los: Qhov Kaj ntawm lub Ntiaj Teb

Ua tib zoo thov Vajtsuv kawm tej yam no thiab nug seb koj yuav tsum qhia dab tsi. Qhov uas koj to taub tus Cawm Seej lub neej thiab lub luag hauj lwm yuav ua rau koj txoj kev ntseeg Nws loj tuaj thiab foom koob hmoov li cas rau cov uas koj saib xyuas tom tsev? Kom tau ntaub ntauwv xov xwm ntxiv, cia li txuas rau reliefsociety.lds.org.

Kev Ntseeg, Tsev Neeg, Kev Pab

Nov yog ib zaj los ntawm tej zaj cov Mus Saib Xyuas Tom Tsev tsab Xov uas hais txog tus Cawm Seej lub luag hauj lwm.

Thaum peb to taub tias Yexus Khetos yog qhov Kaj ntawm lub Ntiaj Teb, peb txoj kev ntseeg Nws yuav loj tuaj thiab peb yuav rais los ua ib lub teeb uas ci rau lwm tus pom kev. Khetos tau ua tim khawv txog Nws lub luag hauj lwm uas yog qhov kaj tseeb uas ci rau txhua tus txiv neej thiab poj niam uas los nyob hauv lub ntiaj teb (saib Q&K 93:2) thiab tau hais kom peb “tsa [Nws] lub teeb kom ci rau lub ntiaj teb” (3 Nifais 18:24).

Peb cov yaj saub kuj tau ua tim khawv txog Khetos txoj Kev Kaj. Thawj Tswj Hwm Henry B. Eyring, tus Pab Cuam thib Ib hauv Thawj Pawg Thawj Tswj Hwm hais tias: “Txhua lub sij hawm nej xaiv sim los ua neej zoo li tus Cawm Seej, ces nej zaj lus tim khawv muaj zog tshaj qhov qub.” Muaj ib hnuv nej yuav paub ntawm nej tus kheej tias Nws yog qhov Kaj ntawm lub Ntiaj Teb. . . .Neej yuav rov qab muab Khetos txoj Kev Kaj ci rau lwm tus hauv nej lub neej.”¹

Txwj Laug Quentin L. Cook ntawm Pawg Kaum Ob tug Thwj Tim hais txog qhov uas peb yuav ua qhov kaj ci rau lub ntiaj teb hais

tias: “Peb yuav tsum pov hwm peb tej tsev neeg thiab nyob ua ke nrog txhua tus neeg uas xav ua zoo ua txhua yam peb ua tau kom muaj qhov kaj, kev cia siab, thiab kev coj ncaj ncees hauv peb tej zej zog.”²

Los ntawm cov Vaj Lug Kub

Yauhas 8:12; Lus Qhuab Qhia thiab Kev Khi Lus 50:24; 115:5

Los ntawm Peb zaj Keeb Kwm

Niaj hnuv no cov poj niam uas yog Haiv Neeg Ntseeg hauv Hnuv Nyooog Kawg tsa lawv tej lub teeb kom siab.

Nyob hauv theem 80 ntawm ib lub tsev siab nyob hauv Hong Kong, Suav Teb, ib tug viv ncaus uas xiam hoob khab—tib tug Neeg Ntseeg hauv nws tsev neeg—tau tsim ib lub tsev uas yog ib qho chaw pov hwm rau nws thiab cov neeg qhua kom lawv hnov tau tus Ntsuj Plig. Nws cov vaj lug kub, nws tej phau ntawm Koom Haum Niam Tsev thiab nws phau nkauj qhuas Vajtsuv yeej nyob ze. Nws tau mus rau lub tuam tsev ua kab ke rau nws cov poj koob yawm txwv.³

Nyob hauv Brazil ib tug niam tsev ncaj ncees tau tu nws cov me nyuam loj hlob nyob hauv txoj moo zoo txoj kev kaj. Nyob hauv nws lub tsev

uas yog thwv cib liab ua lawv tau hu zaj nkauj los ntawm lub Koom Haum Me Nyuam Yaus, thiab cov duab los ntawm *Liahona* txog cov tuam tsev, Vajtsuv cov yaj saub, thiab tus Cawm Seej tau npog lawv tej phab ntsa. Nws thiab nws tus txiv tau muab ntau yam tso tseg kom thiaj mus tau ua kev cai sib khi hauv lub tuam tsev ua rau lawv cov me nyuam yuav muaj niam muaj txiv uas yuav nyob mus ib txhis ua ke. Nws thov Vajtsuv tsis tu tsis tseg kom tus Tswv yuav pab nws tu nws cov me nyuam loj hlob hauv txoj kev kaj, qhov tseeb, thiab lub zog ntawm txoj moo zoo.⁴

LUS CIM

1. Henry B. Eyring, “A Living Testimony,” *Ensign* los sis *Liahona*, Tsib Hlis Ntuj 2011, 128.
2. Quentin L. Cook, “Let There Be Light!” *Ensign* los sis *Liahona*, Kaum Ib Hlis Ntuj 2010, 30.
3. Saib *Daughters in My Kingdom: The History and Work of Relief Society* (2011), 163–64.
4. Saib *Daughters in My Kingdom*, 164.

Kuv Yuav Ua Dab Tsi?

1. Sib tham seb qhov uas yus ua ib lub teeb rau neeg ntiaj teb txhais li cas niaj hnuv no.
2. Sim xav seb qhov uas koj ua raws li Khetos txoj kev kaj yuav pab koj nyiaj tej kev sim siab li cas.